



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8 Yangia anidakangma : Tir Yimiyim tir_yimiyim

tir yimiyim TAPAK 7

**Milan-i coach Fonseca
mapa nungi anentsüogo**

**39 buba US tir Jimmy Carter
arishi kum 100 nung süogo**

VOL. XXII ISSUE NO. 79 (ADOK 79) DIMAPUR SANGTENNÜ (TUESDAY) LUCHII (DECEMBER) 31, 2024 ₹ 5.00

NFHRCC-i Foothills Road Phase 1 tenzük

Dimapur, December 30, 2024 (TYO): Nagaland Foothills Road Construction Committee (NFHRCC)-i December 30, 2024 nungi 2 Lane Foothills Road Construction mezüngbuba shilem tenzükogo.

Peren District nung NFHRCC-i Diunaki River temdanga 48M (100FT) Span Galvanized Double Lane Modular Steel Bridge yanglutsü tenzüksüogo. Iba ya 2 Lane Foothills Road Construction nung Phase 1 buba lir.

Iba apu yanglutsüba tesem nung Zeliang aser Kuki CSO lennirtem den temeket yimtsüng 8 nungi Village Council Chairman tem aser ano District Administration o NPWD, Peren Division Division ketdangsurtem dena tanü sarasadem sentong ka agiogo.

"Foothills Road mapatong ya 2013 nung Tizit nungi Khelma (kilometer 395) yanglutsü shisateta liasü. Iba mapang Naga kin hoho 10-i pusema nungita liasü aser tesülen Zeliang o Kuki hohotem aden" ta NFHRCC, Asst. Gen. Secy. Chenithung Humtsoe-i ashi.

Tang tashi nung Nagaland sorkar iba mapatong nung Rs.


100 crores shi endokogo. Governor's Camp, Liphayan Baghty Division, Wokha District nung Doyang ayong temdanga Nagaland nung apu talangtiba yangluogo aser Tizit nungi Niuland tashi fair weather single lane connectivity road ka renemogo, ta pai ashi.

Küm 12 tashi Nagaland sorkar dang iba Naga otsüsüsü lenmang yanglutsü atema kanga dang meranga jembiyonga aser mepishia arur sorkari 1st Phase ama SASCI Program (Scheme for Special Assistance to States for Capital Investment) kübok Rs.148.5 crores soft loan agütsüogo. Iba atema NFHRCC-i state sorkar dang pelaba metetdaksüogo.

Foothills road mapatong ya Extra Ordinary project ka ama züngshir ekchiyong Naga public-i temenok kecha melii ali tenlatsü, contractor tem dang nungi tax mesaruzüsü aser statutory fee dak alaka sorkari sen magitetsü tezüngzüktep yur iba mapa tenzük.

NFHRCC-isa Implementing Agreement nung sign mesüi aliba contractor tem dang pei pei lemzüka aliba mapa tenzüksü atema sign asütsü mepishia metetdaksüogo.

Alima lennirtemi taoba US President Jimmy Carter tushir



New Delhi, December 30, 2024 (Agencies): 39 buba US President Jimmy Carter Deobarnü asüba atema alima lennirtem aser US yimtsüsürtemi asükhu osang lemsatepba manener.

Carter-i US President inyakdang Israel aser Egypt tsüngda yimjung yanglua liasü. Pai meimchir asoshi mapa tajung inyakba ajiteta Nobel Peace Prize agütsüogo. Pa arishi kum 100 nung asü.

"Tanü America aser alimai khenyongi lennir balaka aser meimchir asoshi bilemetsür ka akoksaogo. Küm 60 tashi onoki Jimmy Carter dang medemer tajung ka ta shia aru. America aser alima tesem balala nung Jimmy Carter den majurutepdanger nisung million aikati pa ya medemer tajung ka ama bilema aru" ta US President Joe Biden aser First Lady Jill Biden nati metetdaksü.

"President Jimmy Carter ya Tsüngrem, America aser meimchir asoshi tamang akangkanga ayuba nisung ka liasü. Pa taküm ajanga tenzükba tashi kuli agütsür. United States

Navy nung Lieutenant ka ama, Georgia nung 76 buba Governor ka ama aser United States nung 39 buba President ka ama pai tenzükba nung tashi alioba sayuogo" ta US Vice President Kamala Harris-ia ashi.

"Asen linük asoshi mapang tajung ka nung Jimmy-i President inyakdang tayongzükbatem ajurua liasü aser pai akokba tashi America nungertakümtem tajungba kümdaktsüsü merangogo. Iba atema asenok ajaki pa dang pelatsüla" ta US President-Elect Donald Trump-ia metetdaksü.

Maneni, taoba President tem-George W. Bush o Bill Clinton aser taoba Secretary of State Hillary Clinton nungeria mangyimba osang lemsatep.

"Asükhu mapang ni taoba American President Jimmy Carter'er kibong, President aser United States of America nungert den asükhu lemsatep. Pai Egypt aser Israel tsüngda yimjung tenangzüktep bentsür aruba ya putiotsü nung teti atema zülüoka lir. Pai meimchirtem asoshi inyakba ajanga temeim, yimjung aser adianu ama alitsü tangatetba

agütsür. Alima nung meimchir tenzükba lennir tongtipang ka ta pa teti bilemetsüsü" ta Egypt President Abdel Fatah Al-Sisi-ia ashi.

Maneni Canada Prime Minister Justin Trudeau, Panama President Jose Raul Mulino, Venezuelian President Nicolas Maduro, French President Emmanuel Macron, Australian Prime Minister Anthony Albanese, British Prime Minister Keir Starmer, UN Secretary-General Antonio Guterres, Ukrainian President Volodymyr Zelensky aser Hungarian Prime Minister Viktor Orban nungeria asükhu lemsatepogo.

US President ka arishi talangtiba alibaji Jimmy Carter liasü. Pa ya Democrat ka liasü aser 1977 nungi 1981 tashi US President inyak.

Küm 77 tashi pa kinungtsü Rosalyn Carter den liyonga arur November 2023 nung la arishi kum 96 nung asü.

US President kati India semdang tasembubaji Carter liasü. 1959 nung Dwight Eisenhower aser 1969 nung Richard Nixon nati semdangba sülen Carter-i 1978 nung India semdanga liasü.

Idangji Carter-i taoba President Neelam Sanjeeva Reddy aser Prime Minister Morarji Desai na den ajurutep aser Parliament nung o jemi.

Jimmy Carter-i India semdang Gurugram (Gurgaon) nung Daulatpur Nasirabad yimtsüng semdanga liasü aser iba nungtem nung iba yimtsüng tenüng Carterpuri ta melener tanü tashi bentshia arur.

Mokokchung nung Watch Night Service agitsü

2024 Watch Nite Service
"Go Forth"
Organised by: Mokokchung Centre
(A People's Group)
Date: 31st December 2024 Time: 9:30 PM

Dimapur, December 30, 2024 (TYO): December 31, 2024 ayaterm nung Mokokchung Centric-i Mokokchung Town Main Centre Police Point nung 52 buba Watch Night Service ayonga agitsü.

Mokokchung jila nung Watch Night Service ya Seasonal Club ajanga 1972 nungi ayongzuka mongyonga arur. Iba sentong nung Mokokchung Town Baptist Church (MTBA)-i temoatsü agüja arur.

Kümtem süia arudang iba sentong ajanga nisung balala ajuruteptsüogo aser telongjem adokdaksüogo. Tesüiba nungbo iba sentong ya khen danga methii dang agiyonga aru saka 2022 nung sentong ayonger telok shinga maliasü.

Iba jagi Mokokchung Centric-i iba sobaliba maneni bentshitsü atema sentong ayonga aru.

Talisa, taküm Mokokchung Municipal Council (MMC)-i iba sentong mayongzükteptsüsa

akümba agi Mokokchung Centric-i maneni iba sentong ayongzüksü mulungtetogo.

Temeimertemi senotsü, sound systems, platform arrangements, services, aser event management teyari balala agüja Mokokchung Centric-i taküm iba benjung ayonga amongtsü.

Tarutsü nunga Watch Night Service maneni agia otetsü atema Mokokchung Centric-i teyari balala bushitepa seed fund ka tenzüksüogo. Iba sen ajanga telok mashii kati tarutsü nung tebilemetsü khuret bena iba sentong ayonga agitsü akok.

Mokokchung Centric-i district administration aser police department dang temelaba agütsüba den yaritepba atema pelaba metetdaksüogo.

Iba dak sendakba osang metetnürtem mesüra tenla agütsünürtemi Atsongchanger (9436606996 Mokokchung Centric) den tongteptsü akok.

FNR & Th. Muivah-i Jimmy Carter mang ayimer

Dimapur, December 30, 2024 (TYO): Forum for Naga Reconciliation (FNR) aser NSCN (IM) general secretary Th. Muivah-i sangdong balala ajanga taoba US President Jimmy Carter nem tetushi agütsüba metetdaksüogo.

"Jimmy Carter-i Nobel Peace Prize, the United Nations Human Rights Award, the Baptist World Alliance Peace Award, aser Indira Gandhi Prize for Peace, Disarmament, and Development dena sempet noklang tema agizükogo. Pai alima ajungalen meimchir temeten, yimjung aser putepshiba atema bendanga agüja inyak" ta FNR-i ashi.

Naga nung putepshiba mapa inyaker lennirtem dangi May 11, 2008 nü Carter-i zülüba shidi ka nung "telok mesüra kati tai inyakbabo zübazüba bilemteter aser yimjung o putepshitsü lenmang angutsüsa kanga tasak"

ta zülüba liasü.

"Nür nübertem atema kum aika nenok timtema aruba telemsa agientsü atema tang ya nenok lenisüba ya asütsü akok" ta Carter-i shidi nungsa shia liasü.

Iba shidi ajanga reconciliation process tashi itshidaksü aser Naga yimten lennirtemi June 13, 2008 nü Covenant of Reconciliation nung sign asütsü ajungmeso, ta FNR-i ashi.

"Carter-isa Naga nungert asoshi yimjung aser Naga nungert o India sorkar tsüngda tangatetep kati arutsü sarasademtsü. Alimai Carter lenisüba senmang bilemtetdang Naga nungert dang pa taküm asoshi tetushi agütsütsü aser Naga nungert ajak chichiba putepshitsü aser yimjung bener arutsü asoshi lenmang bushiteptsü ayongzükert" ta FNR-i metetdaksüogo.

Taoba US President Jimmy Carter asüba osang angashia

temulung raksar ta NSCN (IM) general secretary Th. Muivah-ia ashi.

Carter ya lennir tajung ka liasü aser pai Naga nungert temetentem akhümtsüba aser kum aika Indo-Naga olemtep indang osang metetmepela aru, ta Th. Muivah-i sangdong ka nung ashi.

July 11, 2002 nü Amsterdam Joint Communiqué sign asüba sülen President Carter-i taoba India Prime Minister asür Dr. Manmohan Singh dangi June 18, 2005 nü shidi ka zülü. Iba shidi nung Carter-i Dr. Singh shisa kaa Naga yimten tebilemetsü tejakleni bener aoba aser latetsü bushiba atema tenüngsang agütsü, ta paisa ashi.

Jimmy Carter asüba ajanga Naga nungert medemer tajung ka akoksaogo. Pa senmang ajanga Naga yimten asoshi inyakba mapa akasodaktsütsü aser ajungmesotsü ta Th. Muivah-ia ashi.

METETDAKTSÜR

Tanü December 31, 2024 anogo nungi sangkum 2025 kum January 2 tashi Tir Yimiyim nung inyakertem kum tasen sodi agir, anungji taruba January 04, 2025 Adok nungi dang Tir Yimiyim angutsü. Iba 2025 kum tasen asenok ajaki taküm tajung nung ngutetsüsa sarasadema atadi.
Tir Yimiyim azünger aser meimertem ajak dang tepela kum tasen salem jelia metetdaksür.

- Yimozülur

Sirhima Youth & Students' Union kum 50 jungogo



Medziphema Sub-Division kubok Sirhima Village nung December 29, 2024 nu Sirhima Youth & Students' Union pur Hon Jubilee benjongmung amungdang tangokba noksa ka nung Kuki Inpi Nagaland tir L. Singisit, IPS (Retd.) den Kuki Students' Organisation Nagaland tir Thangjamang aser dangartem angur.

Dimapur, Luchii/December 30 (TYO): Sirhima Youth & Students' Union (SYSU) pur kum 50 ajungba Hon Jubilee benjongmung December 29, 2024 nu "Half a Century: Towards a Limitless Future" omen nung ajemdaker mungogo.

Iba benjongmung nung ana aser talang nungi delegates tem jaoka benjong mera ketdaksü, kong L. Singisit, IPS (Retd.), President, Kuki Inpi Nagaland ajanga jubilee nungshilong semzüksü aser Rev. Lamkhulun Singson, Youth Secretary, KBAN ajanga iba long meshiteta sarasademsü.

Rev. David Vaiphei, ES KBAN ajanga iba benjongmung sentong tenzuka sarasademba den asurtem bilemtet aser Seitinnam Singson, Chairman, SYSU ajanga pela agizükba o jembia liasü.

Sentong akhumdong L. Singisit, IPS (Retd.) ajanga lanurtem dang pei nukjidong mezung sudaktsür takok mangu tashi merangtsü nenshia ashi.

Lanurtem dang mangdang tulu ayutsü, timtem aremtsü aser telemtetba tajung agitsü paisa ayongzuka liasü.

Benjongmung nung tetushi tesemdanger Kuku Students' Organisation, Nagaland (KSON) tir Thangjaman ajanga iba benjongmung nunguo kaket sayatsü aser lanur lenirtem dang pei nurburtem temeim agi bendanga agütsür tenzüksü ajungshia liasü.

Paisa tsurabur aser tantsü-tambo tem dang maneni lanur tejakleni aoba nung yaritsü ayongzük.

Sentong nung SYSU Cultural Troupe ajanga sobaliba tsünsang ka agi shilem agi, Chongboi Singsong, General

Secretary, SYSU ajanga sempet agütsü, SYSU ajanga jubilee ken aten.

Thangkai Manlun ajanga iba jubilee ken aten aser iba sülen Kapminlul Chongmun, Convenor Jubilee Committee ajanga melepzung o jembi aser Lhunlam Thomsong, Pastor KBC, Sirhima ajanga sarasadema mezung sentong temer jubilee chiyongba mapang liasü.

Jubilee tembangba sentong nikongdang agidang alakteta jaoker C. Singson, Social Worker aser tetushi tesemdanger Seikhongam Haokip, Director ADP, SAP Application Support APAC, Global Portal and Workforce liasü.

Iba sentong nung Kuki nungur kentener Nengsi Vaiphei, Doumin Khongsai, Kaimang Hangsing aser Joseph Thomsong nungeri ken tena liasü.

MULUNGNEN O



ASÜR I. BENDANGANGSHI UNGMA, EX. MLA

ASO: 18-05-1933 ~ ASÜ: 27-12-2024

Onoki teti meima aliba Obala I. Bendangangshi Ex. MLA shiranga aliba mapang nungi tasünü tashi kija, kibong aser lokti balalai ozü kibong rongjena metoktsü rongsen, nubu aser sarasadem nuktzü agi nungita yariba asoshi nenok ajak dang kangasa pelaba lemsateper.

Nenok kija shia dangi ozü tsungtong arua pelaba melemsatetba atema sasar saka asen tulusang Tsungremi nenok ajak maneni moajangma ta ozü sarasadem.

~ Temeim chirnur, anukapang aser semchirtem.

Dimapur nung nisung tasumang ka ngutet

Dimapur, Luchii/December 30 (TYO): Rangapahar aser Thahekhu Village tsungta KM 256/2 nung Railway track nung tebur tasumang ka nguteta lir, ta Station Manager, NF Railway Dimapur ajanga tezüluba ka December 30, 2024 anepdang 7:30 ako meta Dimapur Police dangi yoka liasü.

Iba osang nung ajemdaker duty nung alirtem iba tesem tonga ao aser non-local tebur arishi kum 60 shi tasumang ka railway lenmang tezülen tasü mejanga aliba angu.

Iba nisungba ya train agi tsükset

südi ta bushitet. Oziung agi melaba maparen ajak tembanga inyakba sülen tasumang ya PM examination aser jangjatetsü atema District Hospital Dimapur morgue nung bener oa lir.

Nisungba ya jacket sentsü tanak, long pant sentsü tanen aser t-shirt sentsü tanen semer liasü.

Kibur/kinunger/tembar temi Officer-in-Charge, Govt. Railway Police Station, Dimapur den Mobile No. 7085055021 nung tongteprateptsü akok, ta Dimapur Police sangdong ka ajanga ashi.

2024 kum Mizoram nung tanur 15,800 dak tema aso, 6,300 shi asü

Aizawl, Luchii/December 30 (Agencies): Mizoram nung 2024 kum tanur 15,800 dak tema aso aser 6,300 dak tema asüba record tejangja lir.

Mizoram indang Economics and Statistics Department ajanga ashiba agi, tanur ya timba Aizawl (6,624) nung aso aser iba sülen Mizoram south tsüsü Lawngtlai district nung 2,367 aso aser Mizoram-Myanmar arütsü nung aliba Champhai district nung asoba kinü tanur 1,407 liasü.

Hnahtial district nung tanur 72 aso aser aji tajemtiba alitsü.

January 1 nungi December 22 tsungta kinü tanur 15,836 aso aser nisung 6,392 asü, ta department ajanga ashi.

Nisung 6,392 asüba nungi nisung 623 cancer agi asü, nisung 520 tangola mesashitetba timtem agi asü aser nisung 467 temulungjang tashidak agi asü.

Nisung 209 lendong balala nung asü aser nisung 58 pei sasa takum agia liasü.

Nisung 4,366 asüba indang kuli tejangja department record nung mali.

Kasa mapang Aizawl (3,041) nisung timtiba asü aser item rongnung cancer agi nisung 344 asü, temulungjang tashidak agi nisung 332 asü aser tangola mesashitetba timtem agi nisung 298 asü.

Aizawl district nung lendong balala nung asüba nisung 114 aser pei sasa takum agir nisung 20 liasü.

Security forces-i Manipur nung nok-nü jenti ngutet



Dimapur, Luchii/December 30 (TYO): Indian Army aser Assam Rifles temi Manipur Police aser danga security forces den lungjemer Manipur kubok Imphal East, Tengenoupal, Yangiangpokpi aser Churchandpur district tem nungi prangbong toku, injang-bomb aser rara nung amshiba osettsüse nguteta liasü.

Imphal East district kubok general area Ngariyan Hill nung prangbong aser injang-bomb aliba osang tejangja angazükba nung ajemdaker Army temi police temi operation agiba mapang Light Machine Gun ka, 12 Bore Single Barrel prangbong

ka, pistol ka, tube launchers ana, tapoktsü oset, injang aser raradang amshiba osettsüset tem December 23, 2024 nü nguteta liasü.

Aser December 27, 2024 nü Tengenoupal District nung Assam Rifles aser Manipur Police temi joint search operation ka agidang factory nung yangluba .303 rifle ka, Improvised Explosive Devices (IEDs) aser grenades tem ngutet. Iba operation mapang NH-102 azüklen telungpur atsükshiba tesem asem nguteta liasü.

December 27 & 28, 2024 anogotem Yangiangpokpi leni lenmang ajanga prangbong

bener aoba osang angazükba sülen Army temi Lamlong leni aoba lenmang nung check post ka amenoka gari tem meita aodang double barrel prangbong ana aser single bore rifles ka gari ana nungi ngutet.

Item hadir ya Manipur Police nem amoktsüogo aser maneni bushisingdangba mapang lir.

Churchandpur District nung December 27, 2024 nü Assam Rifles aser Manipur Police lungjemer operation ka agiba mapang K Lhanghnom Vangkho village nung under construction post astride NH-2 jangjateta liasü. Iba post ya telungpur temi amshi südi ta temulung melemtetli lir.

Mizoram angh inyaktsü Vijay Kumar Singh tezungzüktep agitsü

Aizawl, Luchii/December 30 (Agencies): Taoba mapang Army Chief General mapa inyakba alisang Vijay Kumar Singh ya Mizoram indang angh tasenba ama January 9, 2025 nü tenangzükba agitsü, ta Hombarnü ketdangsür kati ashi.

Iba sentong nung Chief Minister Lalduhoma, par cabinet zungsemtem, Assembly Speaker Lalbiakzama, Deputy Speaker Lalfamkima, MPs, tongtipang ketdangsür aser alakteta jaokertem adentsü.

Singh nem oath of office and secrecy ya Chief Justice of Gauhati High Court ajanga ketdangsüa agitsü.

Mongulbarnü India Tir Droupadi Murmu-i shimsang Singh yagi Hari Babu Kambhampati

melentsü, shiba Raghubar Das mapa nungi anenba sülen Odisha angh inyaktsü shima liasü.

1951 kum asosang Singh ya 2010 nungi 2012 tashi 24 buba Chief of Army Staff inyakba liasü.

Military nungi anisungzükba sülen pa 2014 kum BJP nung aden aser Ghaziabad, Uttar Pradesh nungi Lok Sabha nung shim aser pa ano 2019 nunga tanaben shima liasü.

Ato Kilonser Narendra Modi indang mezung kümsük nung Singh ya Minister of state for external affairs, Minister of state (Independent Charge) for the Ministry of development of North Eastern Region (DoNER), aser Minister of state for statistics and programme implementation ama inyakba liasü.



December 30, 2024 nung Patna nung Left party tem nungi züngsemtemi, Union Home Minister Amit Shah-i Parliament nung B.R. Ambedkar mezüngmeshia jembio, ta aija longkak aitba noksa nung angur.

Sangküm India nung WAVES Summit ayonga akatsü: PM Modi

New Delhi, December 30 (Agencies): Tang mezüng India nung World Audio Visual Entertainment Summit (WAVES) ayongzüka akatsü; iba ya alima nung sempet alirtem sempet sayatsü atema alima sabang ka asütsü. Amongnü 'Mann ki Baat' Radio sentong ajanga linük nüburttem den jembidang Modi-i, sangküm February ita nung India nung WAVES Summit ayongzüka akatsü, ta metetdaksü. WAVES ya Davos nung ayongzüka World Economic Forum ama tongti sentong ka asütsü, ta shia Ato kilonseri, media aser entertainment industry nungi lenirtem aser alima tesem balala nungi sempet

alirtem Delhi nung adenshia February 5 nungi 9 tashi senden akatsü, ta ashi. "India ya alima nung 'content creation' atema tiyongsü tesem ka kümdaktsütsü atema iba Summit ya kanga tongtibang asütsü," ta pai ashi. "Na lanur creator ka süaka Bollywood mesüra regional cinema nung artist ka süaka, TV industry nung mongin ka süaka, animation, gaming mesüra entertainment technology nung tasen purapiteta inyakertem süaka WAVES Summit nung adentsü atema ni na ajungshir," ta Ato kilonser Modi-i metetdaksü. Paisa entertainment aser

creative industries nung inyaker ajak dang WAVES Summit nung shilem agitsü ayongzü. WAVES Summit nungsa animation, gaming, entertainment technology aser regional & mainstream cinema nung India tejakleni aoba sayatsü, ta paisa shisem. Modi-isa film director, asür Raj Kapoor aser kentener, asür Mohammed Rafi na sor küm 100 ajungba ita (December) nung tenaprongla nem tetushi agütsü. Modi-isa asür Akkineni Nageswara Rao-i Telugu cinema ajungkettüba aser pa mapatem ajanga India nung sobaliba sayaba atema pa nem tenüngsang agütsü.

Prashant Kishore den mejangjaba nisung 700 anema FIR benok

New Delhi, December 30 (Agencies): Amongnü election asalentong yanglur mongin, Prashant Kishore-i kaketshirtem pusema longkak aita Bihar Public Service Commission (BPSC) exam agishitsü akhangba sülen pa den tangar 700 anema FIR benok. Bihar Public Service Commission (BPSC) tatidang agütsütsüpurtemi 70buba Combined Competitive Preliminary Examination (CCE Prelims) tatidang agishitsü takhangba agütsür. Amongnü Bihar yimtiba, Patna nung aliba Gandhi Maidan nung kaketshirtem longkak aitba nung Kishore-ia shilem agia liasü. Patna district magistrate (DM)-i, ktdangsertemi tuyuba

anema longkak aittsü atema kaketshirtem ayongdenba atema Kishore anema ken o benok, ta metetdaksü. "Ktdangsertemi longkak aittsü atema temelaba magütsü, saka longkak aiterem Gandhi Maidan nung adenshia liasü. District police-i Prashant Kishore, par party nung Tir Manoj Bharti aser yimti nung tesayur Ramanshu Mishra nung densema mejangjaba nisung 600-700-i Gandhi Maidan nung kaketshirtem ayongzüka longkak aitba atema parnok anema ken o benok," ta District Magistrate, Chandrashekar Singh-i metetdaksü. Jan Surraaj party tentetsang, Prashant Kishore-ia kaketshirtem den külemi longkak aitba nungji shilem agia liasü.

Osangbenertem den jembidang Kishore-i, "Onok longkak aittsü atema aoer masü. Kaketshirtem yangji mena lir, ibayongji parnok ajurutsü atema onok iba tesem jagi aoer. Gandhi Maidan ya public tesem ka aser anogo shia nungtem iba tesem jagi aoer. Kaketshirtem atema tesem melira parnoki public aliba tesemi aotsü," ta ashi. Paisa, "Bihar ya democracy tetsü lir, aser kaketshirtem nem parnok tebilemba jembidaktsütsü atema parnok nem temeden magütsüra koma asütsü? ibayongji onok kaketshirtem den lir," ta ashi. Lokti den jembidang Kishore-i, kaketshirtem ajak tenüng nung züngsem pongui state chief secretary ajurua parnok takhangba metetdaksütsü, ta ashi. "Ktdangsertemi o lemteptsü melungogo. Telemtetba ka dangi marura kaketshirtemi Hombar nungi asentenshir longkak aittsü," ta pai metetdakja liasü. Paisa kaketshirtem dang khenpiga atema longkak aitba anena atatsü mepishi, saka kaketshirtemi tashi mangaia longkak aita Chief minister Nitish Kumar 'er ki tsütsüleni longkak aita aoba ajanga police-i ajok amshitsüsa aküm.



December 30, 2024 nung Mumbai nung Maharashtra Chief Minister, Devendra Fadnavis aser Madhya Pradesh Minister Kailash Vijayvargiya na senden amenba sülen tangokba noksa nung angur.

SP City Sweety Sahrawat-i, "Onoki kaketshirtem dang iba tesemji toktsür oang ta ashi saka parnoki tashi manga. Parnoki tekong merangba ajanga onoki parnok dak tzü khaloktsü," ta metetdaksü. "Paper leak süogo ta tai tongloktsüba sülen December 15-16 nung BPSC-i exam centre ka nung dang tatidang thinena liasü, ibayongji kaetshirtemi centre ajak nung tatidang agishitsü akhanger," ta RJD lenir kati metetdaksü.

Linük mangyimba mapang Rahul Gandhi bendangleni ao: BJP

New Delhi, Luchii/ December 30 (Agencies): Congress-i Dr Manmohan Taoba mapang Ato kilonser, Manmohan Singh tasü mang magütsü. Ibaji parnok arongba dak sendakba nung BJP aser Congress na aitsütepa aruba sülen BJP-i maneni Rahul Gandhi aitsüogo. BJP-i, Dr. Manmohan Singh asüba atema linük nung nüburttem ajaki mangyimba mapang nung Congress MP aser Lok Sabha nung Opposition lenir, Rahul Gandhi bo küm Tasen benjung amongtsü atema bendangleni oadokogo, ta metetdaksü. BJP otongdar, Shehzad Poonawalla-i, Congress party-i tim masüba nung Dr Singh amshi aser mezüngmeshiogo, ta aitsü. Shehzad Poonawalla-i X ajanga, "Taoba Ato kilonser Dr Manmohan Singh asüba atema linüki mangyimba mapang nung Rahul Gandhi bo New Year amongtsü atema bendangleni ogo. Pa akumli mapang nunga Congress-i Dr Manmohan Singh anepalu masü. Parnoki pa amshi aser mezüngmeshi. Tang-a parnoki yamaji inyaker. Yashi pa mitsü abenia shinga

(Congress nungi shinga) mao. Singh nem Bharat Ratna-a magütsü. Ibaji parnok melungsentsü lir," ta metetdaksü. Poonawalla-isa, Rahul Gandhi atema tourism ya tang tasen masü, ta ashi. "Rahul Gandhi-i LoP tetezü Leader of Opposition melenshia Leader of 'paryatan' aser Leader of the party melenogo. Rahul Gandhi aser 'paryatan' ya tang tasen masü," ta pai ashi. Kiralongrartemi Mumbai amakba (26/11) mapang nunga Rahul Gandhi bo aonung piyong party nung benjungtepa liasü, ta ashi. Ibaji langzüa Congress MP, Manickam Tagore-i X ajanga, "Dr. Singh tasü mang Yamuna ayongküm nung arongtsü atema Ato kilonser Modi-i temelaba magütsü aser par minister temi Dr. Saheb'er kibong anema inyakba ya taaktsüka lir. Gandhi nija nüngdak atema aini aoba ajanga nenok kechi timtem angur? New Year nungbo taneptsü nguang," ta ashi.

January 4 nü aluyimertem senden ayongzüker

New Delhi, December 30 (Agencies): Aluyimertemi January 4, 2025 nü parnok longkak aitba tesem Khanauri nung "Kisan Mahapanchayat" ayongzükerogo. Samyukta Kisan Morcha (Non-political) aser Kisan Mazdoor Morcha nati December 30 nüa Punjab bandh

ayongzüka lir. Osangbenertem den jembidang SKM (Non-political) lenir, Kaka Singh Kotra-i, "January 4 nü Khanauri nung onoki Kisan Mahapanchayat ayongzüker aser iba senden nungji state balala nungi aluyimertemi shilem agitsü," ta metetdaksü.

FORM NO. 14 [See Regulation 33 (2)] OFFICE OF THE RECOVERY OFFICER - III DEBTS RECOVERY TRIBUNAL GUWAHATI Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati-781007 (Assam) DEMAND NOTICE RECOVERY OF DEBTS & BANKRUPTCY ACT, 1993 NUNG SECTIONS 25 NUNG 28 TASHI ASER INCOME TAX ACT, 1961 NUNG SECOND SCHEDULE KÜBOK RULE 2 NUNG AJEMDAKER NOTICE AGÜTSÜR RC/16/2024 STATE BANK OF INDIA - Versus - MESSERS REAL RUBBER INDUSTRIES To, (CD 1) Messers Real Rubber Industries, Zhimo Vikugha Shiyito Zhimo Hevish, Village Sub Division Nuland, Dimapur, Nagaland-797112 (CD2) Mr. Anil Lakhtokia, S/o Late K L Lakhtokia, C/o Raj Canvas Church Road, Dimapur, Nagaland-797112 (CD3) Mr. Vikugha Zhimom, Son of Shiyito Zhimo, House No. 42, Hevish Village, Kuchia Bill, Nagaland-797112 OA/198/2018 atema DEBTS RECOVERY TRIBUNAL GUWAHATI nung Presiding Officer-i tuyuba nung ajemdaker Recovery Certificate agüja sen 77,09,279.46 (Rupees Seventy Seven Lakhs Nine Thousand Two Hundred Seventy Nine and Paise Forty Six only) den pendentele aser future interest @ 12.85% Compound Interest Monthly 21.04.2018 anogo nungi tenzüka sentsuh mouma tashi aser costs sen 80,000 (Rupees Eighty Thousands only) na (Jointly and severally/ Fully/Limited) anema sentsuh lir ta metetdaksür. 1. Amount due as per the Recovery Certificate: Rs. 77,09,279.46 2. Interest from 21.04.2018 to 18.04.2024 @ 12.85% Rs. 67,38,683.24 3. Costs Rs. 80,000.00 Total :- Rs. 1,45,27,980.70 (Recovery :-) Rs. 26,93,346.00 Total :- Rs. 1,18,34,634.70 2. Iba notice agütsüba sülen anogo 15 tsungda tekalen shia aliba sentsuh agüjang ta tuyur, mesüra Recovery of Debts Due to Banks and Financial Institutions Act, 1993 aser Rules nung aliba ama sentsuh alangzüksü atema inyaksangshitsü. 3. Taruba ken o mangadanga affidavit nung nü kiojen osang agüjang ta nü dang tuyur. 4. Maneni ken o angadangtsü atema 10.01.2025 anogo nung anepdang 10:30 tashi nung tsunglanglen sign süa alir matsüngdangi arung ta tuyur. 5. Tekalen shia aliba dak allia nai item sen-a agütsütsüsa akümsü: (a) Certificate/execution proceedings indang iba notice agütsüba mapang nungi tenzüka item ama interests. (b) Iba notice aser warrants agütsüdang teindokba senotsü ajak aser sentsuh alangzüksü atema inyaksangshidang indokba sen ajak. Tsunglanglen kü meyongnem den iba Tribunal indang seal iba anogo: 25.10.2024 nung agütsür. Recovery Officer Debts Recovery Tribunal, Guwahati



TIR YIMYIM YIMOBILEM (EDITORIAL)

DIMAPUR SANGTENNÜ, DECEMBER (LUCHII) 31, 2024

Shisaboluba küm

Taküm 2024 küm ya asenok asoshi dang masü saka alima nung alir aika asoshi alima lendong tzümetsüng aser menoknok agi dang masü saka kin o kin na tsüngda tongpang rara balala nung nisung taküm aika samaba aser taküm mesamai kümzükertema talidak aser tejenokdak maka shisaboluseta nemzünempongertem akümba shisabolu küm ka liasü. Aji oda, asenokia meteta anogo shia Russia o Ukraine na tsüngda rara nung yimti topur tajung agi aut küma samaba, Israel aser Hamas na tsüngda rara nung tetsür tanurtem dena talidak maka jenshia senzüba, Myanmar nung government sepaitem o parnok anemer nübor sepaitem na tsüngda rara nung yimtaklirtem taküm samaba osang tamajungtem agi asenok dena shisabolutsüsa atalokogo. Item lendong timtem dang nungibo taoba ano asen kidanger Manipur nunga yaküm küm nungi kin o kin na tsüngda kati ka anema maktepba agi tenüng agibo Manipur longjema lir saka mapa agibo Manipur ana küma sadanger nüboritem aika shisabolu tia nung küm süitemdaksür. Atangji, item tia denji asenok medemdangdangbo asenokbo kecha balaka shisabolutsüsa masü yimjung aser tesünep nung aliba lima aser nüboritem ta shitettsü. Ajisüaka, asenoka asenoki asenoksasa yangluba tebilemstütem agi asenok shisabolutsüsa asenoki atongteter. Item shisabolutem rongnung tulutiba kaji, Naga yimten nüchiso bushirtem rongnung telok balala küma razüka aoba ya asütsü. Iba jagi asen lima tilaka ya linük 'president' aser 'prime minister' aika aliba lima ka kümogo. Item telok ajungaji saru agi taküm alitsü aser iba saruji Nagaland nung alirtemi agütsütsü. Iba jagi taküm küm tsüngda Naga yimten nüchiso bushir telok tenüng nung tashiyim agi Naga nunger business inyakertem dang sen meshiba anema lokti tentetemi ola adokba asenoki angashiogo. Kasa timtemji government mapa inyakertemi anogo shia pei mapa inyakdak ajurudagi. Joko, telok onsara aküm nungji sarua aika akümer, anungji nisungtemi maremer, iba jagi nüboritemi yimten nüchiso bushir teloktem mapa anema ola adoker. Iba ya Naga nunger yimten nüchiso bushir teloktem asoshia shisabolutsüka lir. Iba amai Naga nunger yimten nüchiso bushir teloktem o Naga nunger nübor na tsüngda meputep aser mepelatep maneni adok nungbo, Naga yimten nüchiso atema raraba tongpang ya Naga nunger o India na tsüngda masü saka Naga nunger o Naga nunger na tsüngda nüchiso atema raraba tongpang ka kümadoktsü. Aji oda, Naga nunger linük tenzükertemi India yimten talenba nungi salatsü asoshi yimten nüchiso atema raratsü aser Naga nunger nüboritemi Naga nunger yimten nüchisi bushirtemi tashiyim agi saru meshia tsübudaktsüba tetsübu nungi nüchiso aginüa raratsü. Ibaji matalokdaktsütsü atema Naga nunger lenirtemi Tsüngrem dang shisatsü meshia Naga yimten tebilemstü ya tatembang kati arutettsüsa inyaktsübaji kanga rongdak nungdak kümogo. Atangji, Naga nungertem asoshi Naga yimten nüchiso atema raraba tongpang nung nokdaka liaka, ano külen Nagaland nungbo India temzüng kübok election kecha tenokdangba melii sademsadema agiteter aser Naga lima tesem ajaklen India wako pelapela ayipzür aser Naga nunger yimsüsürtemi India wako nem salem agütsür aser India temzüng kübok tashi angaa alitsü nangzüker yimsü asür. Aji oda, shisabolutsü aika liaka taküm 2024 küm Nagaland nung ajaki süngmangtsüsa inyaktetba mapa kaji Lok sabha election nung Nagaland MLA tejang kata maliba Congress telok nungi Wb.Supongmeren Jamir adokdaktsüba mapa to liasü. Iba denji Nagaland asoshi mapa tajung ka 2024 küm inyaktetbaji, Municipal aser Town Council Election agiteta mapa ya asütsü. Atangji, shisabolutsübaji alima nung meimchir sübutsü, ajisüaka shisaboluba nem asenok kokdaktsütsübaji masü saka asenoki asenok shisabolubatemi akoktsüla. Iba tangatetba nung parliament nung süshia, assembly nung süshia mesüra ULB nung süshia asenoki shimtetba yimsüsürtemi küm tasen nung asenoki tanü ajuruba timtem aser shisabolutem ya kokteta pei nüboritem asoshi tajungba inyaktsütsü imlar.

OLEMSABANG

TEMULONG LEMTETBA KILIR ASER KILIR TAMAJUNG

~ L. Kika Pongener.

Tsüngremi pa mapa nung tenzüktsü balaka bendanga shimtetba aser ajaba rongnung, tenzüker aikati lanlia kilir tajung ta ashitsüsa tenzüktteter, saka karibo kilir tamajung ta ajatsüsa tenzüktteter. Yisu alima nung alidang pai pa sulen anidakertem dang sayutsüngidang o entepba tapu aika amshia jembiba agür. Mathi-25:14-30 nungji züngra, "Kibur kati kilir ka nem sen mori pongu, ka nem ana, aser ka nem ka, ta nisung shia nem pei akokba yari agütsü; aser pa aeni ao. Sen mori pongu agizükbai oa aji agi shishia, ano sen mori pongu ajangzük, mori ana agizükba-ia ano mori ana ajangzük. Saka shibai mori ka agizük pai oagi, ali tur pei kibur sen miima ayu. Mapang talangka lir külen kibur arur parnok den züngdangtep. Aser mori pongu agizükbai ano mori pongu ajangzüker arua ashi, "Kibuba nai kü nem mori pongu agütsü ano ni mori pongu ajangzükogo. Pa kiburi ashi, Lanlia tajung aser temulong alemba kilir; oset ishika madak ni ne dak temulong lemteta liasü, ni na oset aika madak kibur kümduktsüdi. Ano mori ana agizükbaia arua ashi, "Kibuba nai kü nem mori ana agütsü, ni ano mori ana ajangzükogo". Lanlia, tajung aser temulong lemtetba kilir; oset ishika madak ne dak temulong lemteta liasü, ni na oset aika madak kibur kümduktsüdi. Aser mori ka ajangzükbai arua ashi, "Kibuba na tetokdak nisung, kong nai maten angji arur, aser kong nai meperok angji bendener ta ni metet". Aser ni tsübua liasü, aser oagi ne mori ali nung miima ayu; ajiang ne meyong kechi aji nai angur. Saka pa kiburi pa dang ashi, "Tamajung aser azümesen kilir, ni kechi nung maten yangji arur, aser ni kechi nung meperok angji bendener ta nai metet". Asenok danga Yisu-i lanlia temulong lemtetba kilir tajung ta ajatsüsa tenzüktteter asü...??? Mesura kilir tamajung ta ajatsüsa tenzüktteter...??? Khristar arogo aser Tsüngrem'er wadang balala nun g tenzüker ajungai khen kanga junga shisadangdi.

Ano asenoki Luke-16:1-8. nungji züngdangra... "Takar nisung ka aser par temaba kilir ka liasü, aser pai kibur rongsen laludagi ta pa aija tangar kari kibur dang ashi, aser kibur-i par temaba kilir-ji jaa pa dang asüngdang...Ne indang ni angashiba ya kechi ? Ne mapa züngdangtepa sayuang, kechiaser temaba kilir mapa nai joko meinyaktettsü. Aser temaba kiliri pei temulong nung ashi.... Kü kiburi kü dak nungi temaba kilir mapa agizükra, ni kechi inyaktsü ? Idangji temaba kilir jagi...Par kibur dang sentsüh-tsüh'er ka-ka pa dangi jaa, mezüngbuba dang ashi, nai kibur nem agütsütsü sentsüh kwika tsüa lir ? Pai ashi, totzü tatakzük noklang ka, aser pai pa dang ashi, "Ne tezüngzüktepba kakat agir yakta tenem züluang". Aser pai tanabuba dang ashi, na-a sentsüh kwika tsüa lir ? Pai ashi tsük tatakzük noklang ka, pai pa dang ashi, "Ne tezüngzüktepba kakat agir yakta tir züluang". Aser pa kiburi kodang züngdangtep... Ochi mashiba temaba kilir tenung asang, kechiaser pai tasa kaa inyaktetogo. Iba temaba kilir yagi kibur dang sayuba tatakzük balaka...Saka pa jurila agitsü asoshi tatakzük balaka ta amshia ketdangsuba mapa inyakba asenoki iba laishiba nungji tejangja angur. Anungji kodang par kiburi züngdangtep kibur tsüngdangbo kecha madoksa makai ajak shidak dang sayutet. Ajisuaka, iba temaba kilir mapa ya meshitak...Saka par kibur tsüngdangbo shitak ama sayutet. Aji oda, par kibur tsüngdang temeden nguaka Tsüngrem tsüngdangpo temeden mangutsü.

Tanü putu nung yimden arogo aser lokti balala nung tenzüker lennirtem aser tamanger tajung aika iba temaba kilirji mesuka, arogopurtem aser nuburtem tsüngdangbo kecha aibelen mali meshi-meshir, kecha madoksa mali ajak shidak dang...Saka Tsüngrem tsüngdang shitak asütsü asü masütsü...??? Tsüngremi hau...ta ashitsü asü mashitsü...??? Tsüngrem tsüngdang temeden angutsü asü mangutsü...??? Iba-jiang kanga agi tongtipangba lir. A.Shin-21:2. nungji züngra..."Nisunger lenmang shiaji pei nukdangbo shidak lir; saka Kibubai temulongjang odanger". Aseni ketdangtua inyakba mapaji asen nukdangbo shidak asütsü akok, mesura külem tenzüker, arogopur tsüngdang aser nubur tsüngdangbo shidak amai asütsü akok...Saka asen mulongjangi agizüktteter asü magizüktteter...??? Asen mulongjangi asen aitsür asü maitsür...??? Mesura Tsüngrem tsüngdang shidak asütsü asü masütsü...??? Kechiaser Tsüngremi-bo asen temulongjang dang agir. Atangji, asen mapaji asen mulongjangi aitsütsüsa sura Tsüngrem tsüngdang kodanga temeden mangutsü.

Temeim yimsusurtem, loktiliba balala nung lennirtem, Tsüngrem lartem aser arogo nung tenzüker aser tenzüklatem ...Arogopurtem aser nuburtemi asen dak tamang kaa aser temulong lemteta, asen nem ketdangutsü nungloktsüba mapa nung aseni nuburtemi temulong lemtettsüsa aser tamang kaatettsüsa ketdang asür asü (?) Mesura asen dak tangar mettsüdaktsüsa ketdang asür...??? Asenok tangar asoshi temettsüdaktsü lung ka masütsüla. Asen nem kechi mapa ketdangutsü nungloktsüdir, kecha tashishitsü makai ochishia merukmeruka inyaktsüla. Asenoki asen nem nungloktsüba mapa nung nisung tsüngdang temeden angutsüsa masü, saka Tsüngrem mulong chitsüsa aser Tsüngremi lanlia kilir tajung ta ajatsüsa tenzüktsü ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Argentina nung Khristantemi National Evangelization Day among



December 27, 2024 nü Argentina nung National Evangelization Day anogomong amongdang Rosario nung aliba San Martín Plaza kima volunteers-i shilem agidang tangokba noksa nung angur.

December 30, 2024: Youth with a Mission (YWAM) den Christian Alliance of Evangelical Churches of Argentina (ACIERA) aser Argentine Bible Society (SBA) longjemer Argentine nung aliba yimti 400 dak tali nung Khrista osang tajung prok.

December 27, 2024 nü National Evangelization Day dak sendakba nung kanga tongtibang tesemtem nung prayer tables 4,000 amenoka Tsüngrem O lemsatap aser temelunger sensotem atema sarasademja liasü.

Sentong ayongertemi ashiba agi, item sentong ayongzüka agiba ya Tenla kidangi marurtem den Khrista osangtajung lemsatepsü aser Khrista dak amangertem nem shilem agidaksütsü nükjidong nung item sentong agi.

Yimti/jila tiyongtsü, shopping malls kima aser nisung jajaba

tesemtem nung prayer tables amenok aser shilem agirtemi senzüsempogertem dang sarasadem onük asüngdanga parnok atema sarasademja liasü.

Iba dak alia temelungertem blood pressure tendangtsü; iba ama mapang nungji volunteers-i parnok den Khrista osangtajung lemsatepsü atema maongka angu.

Item sentong nung shilem agirtemi tasen aika purapiteta moapu nung senzüsempogertem den temeim aser teimla osang lemsatepa liasü.

Iba dak alia television broadcast saya aser sentong ketdangtsüa agir anaji Pastor Alejandro Espínola (ACIERA Secretary) aser Paula Rodríguez (YWAM) na liasü.

Ghonda asem broadcast asüba mapang nung pastor tem aser sayutsüngirtem

interview agi aser linük tesem balala nung ayongzüka agiba sentongtem osang-a metetdakja liasü.

Broadcast interview nung shilem agirtem rongnung Rosario pastors José Luis Urso aser David Sensini na aser Santa Fe nung vice-governor Gisela Scaglia nung densema liasü.

TV sentong nungjisa Governor Maximiliano Pullaro-i Evangelical Arogotem ajanga loktiliba nung shilem tajung agiba lemsatepa liasü.

National Evangelization Day anogomong sentong tembanga ACIERA Tiri iba sentong ayongzükertem ajak dang pelaba lemsatep.

National Day of Evangelization ajanga Yisu temeim lemsatepsü asoshi linük ajak longjemtetba kuli süa sayuogo, ta sentong ayongzükertemi metetdaksü.

Bangladesh nung Christmas mapang Khristan ki 17 rongdoktsü

Dhaka, December 30 (Agencies): December 24, 2024 nü Bangladesh nung Chittagong Hill Tracts kübok Notun Tonghiri Tripura Para nung Khristantem ki 17 rongdoktsü.

Yimdaklirtemi police dang, mejangjaba nisungtemi parnok kidang mi senoktsü, ta metetdaksü saka Bangladesh sorkaribo, ki rongdoktsübaji akhidang nungi yimdak telok ana tsüngda tsükchitepba den sendaktepa alitsüa akok, ta

shio.

Ki rongdoktsüba tatalokba dak sendakba nung nisung pezübo puogo. Ayaterm 12:30 ako mapang yimdaklirtemji anasa aliba yim kati oa Tenla kidang tekülem sentong agiba mapang nung kari ki rongdoktsü, ta Bandarban district nung ketdangsertemi metetdaksü.

Ki 17 rongrep aser ki ana tera arong.

Iba tatalokba aija sorkari, yimdaklir kati FIR benokogo aser FIR nungji ki rongdoktsüba

atema Khristan trok aser Bengali nung Muslim ka nem tai tonglokja lir, ta metetdaksü.

Sorkari Police dang iba tatalokba tekeraba nung bushisüngdanga sülen osang metetdakjang, ta tuyuogo.

Iba yimji akhidang nungi 'Christian Tripura' nungertem aliba yim lir. Khristantem tanaben ki süshitsü atema sorkari senotsü teyari agütsüba den külemi chiyungtsü aser nungdakba osettsüset-a agütsüogo.

Taküm FCA-i Laishiba 200,000 dak tali lema agütsüogo

December 30, 2024: Taküm Fellowship of Christian Athletes (FCA)-i alima tesem balala nung Laishiba 200,000 dak tali lema agütsüogo.

Taküm FCA-i US aser alima tesem balala nung camps 1,042 ayongzüka agi aser item sentong nung adenertem 110,000 dak tali liasü.

FCA Ministry-i coach aser saisapongertem Khrista den tesendaktep tajungba kümdaktsütsü atema rangloker inyaker.

Parnokisa item camp nung adaner ajak nem FCA

Laishiba kaka agütsür.

Taküm-a FCA-i coach tem aser saisapongertem Khrista aser Arogo den sendaktepsütsü atema Laishiba 219,444 agütsüogo.

FCA Tir aser CEO, Shane Williamson-i, "Onoki Tsüngrem O aser Laishiba nung aliba atangji atema inyaker aser onok ministry mapa nung Tsüngremi sayatenya mapa inyakba ajanga onok süngmanger," ta metetdaksü.

Saisapongertem nem Laishiba agütsüba dak alia

FCA-i tanela asüngsashitsü training-a agütsür.

FCA-i ayongzüka camps tapu trok lir, aser itemji Sports Camps, Leadership Camps, Coaches Camps, Team Camps aser Partnership Camps lir.

FCA atema taküm omenji Rom 15:13 nung ajemdaker "24/7" liasü.

1954 küm FCA tentetba sülen nungi tang tashi nung FCA indang camps, Laishiba lemtsüba aser outreach program balala ajanga coach aser saisaponger taküm meyrjang aika melenshio.

ANOGO ABEN TSÜNGREM DEN

Khrista Mulungsentsü Adenba

"Shibai Pa temulung metet ? Saka asenok dak

Khrista temulung lir." I Korint 2:16.

Ibai tamangertem nem tekümtet sempet agütsüba indang tatsütiba nung ashiba lir. Kechiaser aikati Khrista ajanga Tsüngremi moatsüba angatettsü makoker. Aiben Tsüngremi shimtetba aser nisungi shimtetbaji balala asür. Asen tsütsü nungi dang ngujemtsübaji meimchir yimya; Tsüngremi mulungba mapa tulu lir ta aseni mebilemer. Tanela Temeshi aruba ajanga Tejen Lai mapang dang nungi tali tamangertem nem Tsüngremi tali agütsür. Yisu tasü nungi shia arur kotaki atuba ajanga Tsüngremi Tanela Temeshi asenok dangi yok.

Pauli ozüng agüja ashibaji tajangshiba nung amendaker masü saka shia aruba Khrista den lungjemba nungi ashi. Tanela Temeshi asazüka magütsü nung Khrista-i nübu lemdanga agütsütsü makok. Asenok dak Khrista-i mulungba melira asenok Pa meyong masü ta Pauli zülu. Asenok Khrista kar. Asenok dak taküm aliba nübu ka alir, shiba shisatsü aser temetetba temaba nungi lir.

Pa shisatsü, temeshiba, temeshitetba, alangzüka Pa mulung nung aliba, asenok meyong lir. Khristai pa mulung den mejembitsü asü ? Atangji masü! Tebilemstüji, asenoki o mesüra Tanela Temeshi dang mangar. Khristai asenok den jembir aser angatsü ata alir.

Bengaluru nung tongti putiri PM Modi nem temepishiba 5 agütsü

Bangalore, December 30

(Agencies): Khristmas mapang Bengaluru nung Archbishop, Peter Machado-i Ato kilonser Narendra Modi dang India nung Khristantem atema 'sempet 5' agüjang, ta shia temepishiba onük pongu agütsü.

December 23, 2024 nü Archbishop Machado-i sangdong ka ajanga, Khristantem amokmerenba anenang, talisa state 12 nung benoka aliba anti-conversion ozüngtem ajanga Khristantem amokmerenba anenang ta metetdaksü.

Paisa Ato kilonser Modi dang, state tem nung chichiba yimsü temeden agütsütsü atema tiyongtsüi ia inyakdaksüner, ta mepishi.

Archbishop-i, state aika nung anti-conversion ozüng benokba atema tebilemstü akar; item ozüng ya ajanga Khristantem mejungi kongshir, ta metetdaksü.

"India nung Khristan yimsü küm 2,000 jungogo saka kechiba India nung Khristantem ya bendanger ama züngshitsü, bendanga züngshitsü aser reshikangshitsü?" ta pai asüngdang.

Anti conversion ozüngtem ya "Freedom of Religion" bills ta ser benoker saka item ozüng ajanga nisung bendanger aser meimchir temeden anema inyaker, ta pai ashi.

Anti-conversion bills dak alia Archbishop-isa tang Manipur nung raraba tensa süngjemtsü atema telemtetba agia inyaksüla, ta ashi.

Paisa, alima nung rara aliba tesemtem nung Ato kilonser-i yimjung atema jembir, ajisüaka tang tashi pai Manipur mesemdang, ta metetdaksü.

Archbishop Machado-isa, 2024 küm India nung Khristantem anema inyakba tatalokba 767 lir, anungji linük nung Khristantem aser Arogo kiojentem anema inyakba anendaktsütsü atema tiyongtsüi ia inyakdaksüner, ta mepishia metetdaksü.

Paisa, linük temzüng kübok senso ajak nem kasa temeden aser maongka agüja lir, anungji Khristantem nem-a kasa temeden agütsütsüla, ta metetdaksü.

Paisa Ato kilonser Modi dang, 2025 küm Pope Francis-i atangji India semdangtsüa inyaksangshidaksüner, ta mepishia metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG

Tawabakongki

(n) yinzü waa ola adokdaksüba kongki (violin)

* Lanurtemi tawabakongki amshia ken tajung ka aten.

Tawangba

(v) tatsük anasa yur akongba (dried by heat)

* Ojalai onok nem tawangba amtsük agütsü.



OLONG PAITEP # 7022

15x15 crossword grid with numbers 1-17 indicating starting positions for clues.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S _ _ _ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 7021 TELANGZÜBA

TIPIEN :

- 2. Bangsemo, 6. Tiptem, 8. Jen,
9. Talilla, 11. Aren, 12.Tzübo,
14. Alia, 16. Angati, 17. Odi,
18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
5. Milen, 7. Tulu, 10. Laza,
11. Aben, 12. Tiyong, 13. Ajizük,
14. Aitsü, 15. Tasa, 16. Aina.



ALOKBAI YISU AJURUNÜR

Alokbai : Hai Revba ! Asenok ya küm 150 tema Yisu asoba benjongmong amonger aser ano kümshia Revival nung Yisu yakta arur ta Ken nunga atener, aser nenokia sayutsüngir, saka tanü tashi kecha oleplang mali ya Koda asü ? Nibo Yisu ajurudangnür aja !

Revba : Alokba, nü oji kanga shidak lir saka joko asenok ajurutepba amabo Yisuji majurutsü, saka lai nung ashibaji Pa anüng Tom tashi dang alutsü aser asenok ayipa atutsü, anungji iba anogo nungji asenoki Pa ajurutsüsa tanüla nung renema alitsü atema onoki sayutsüngir, anungji Koda ?

Alokba : Asenok Yisu asoba benjongbo akidang nungi monga aruba, taoba hopda tashi mongogo anungji Yisu joko Kanga tain kümer alitsü aser asen den tejak o tejak na ajurutepa arutsü ta nibo bilem, saka nai ashiba amajiang süra nia tanü nungi tanüla nung Yisu alurutsü apusodi,

Revba : Küm 150 tema amanga arubachir Alokbai, tanü nungi dang süaka Yisu ajurutsü apusoangni !!!!!

Lilir : I. Kilang, Ajem, Indisen, Dimapur,

Special Task Force (STF)-i Kokrajhar nung jihadist ka apu



Guwahati, December 30, 2024 (Agencies): Assam Police nung Special Task Force (STF)-i Kokrajhar nung jihadist ka puogo. STF Police Station ken o (21/2024) nung tongti süa

taï tonglokja alirtem rongnung iba nisung dena lir.

Iba nisung ya Kokrajhar nung alir Gazi Rahman (35) ta jangjaogo. STF-i özüng dak sendakba mapa tenzüko aser maneni iba ken o den sendaka alir ajak aputsü atema bushisüngdangtsü.

STF-i 'Operation Praghat' ta ser inyakdang Rahman apu saka pa ya Ansarullah Bangla Team (ABT) züngsem asü masü memetetdaksü lir.

"Rahman apuba ya Operation Praghat nung shilem ka lir. STF-i Kokrajhar Police teyari agia pa apu" ta IGP (STF) Partha Sarathi Mahanta-i ashi.

December 27 nü STF-isa Dhubri district nung arishi küm 36 tain Shahinur Islam apu. Bandhabpara, Bilasipara nung mita aodang STF-i taitüsü aketba osettem, kulikakettem aser

electronic devices ngudet.

December 24 nü Kokrajhar kübok Namapara area nung STF-i kiralongrar telok ka den sendaktepa alirtemi mapa tamajung inyaksü aliba noktang. Iba mapang parnoki Abdul Zaher Sheikh aser Sabbir Mirdha na apu aser tena ket nungi prangpong-injang den IED yangluba tapoktsütem apu.

STF-i Operation Praghat inyaka arudang Assam, West Bengal, aser Kerala nung jihadi networks den sendaktepa alir nisung 12 puogo.

Taoba hopta kasa ken o dak sendakba nung nisung asem apu. Ano Hokolbarnü Dhubri district nung STF-i jihadist ka apu.

Christmas atongtsü anogo ka lia Kokrajhar nungsa nisung ana ket nung prangpong-injang bona aliba apu.

St Alphonsa School lendong atema nisung 1 apu

Guwahati, December 30, 2024 (Agencies): December 14, 2024 nü Arunachal Pradesh kübok St. Alphonsa School nung

azüklen water tank ka chirepdang kaketshir asem asüba ken o dak sendakba nung police-i ano nisung ka puogo.

Police-i Kerala kübok Putthupally nung Kurian Pallikunnel John (64) apu. Pai water tank yangluba ketdangtsüa repring aser Hokolbarnü Guwahati nung apu.

John ya St. Alphonsa School nung hostel supervisor inyaka

liasü aser Building Norms and Standards (BNS) Act nung non-bailable warrant kübok apu.

John-i hostel supervisor ama inyak aser idangji water tank yangluba ketdangtsüa repring. Iba lendong atalokba sülen pa jena ao ta police-i ashi.

"John ya Yupia nungh Judicial Magistrate First Class dangi anir aotsü" ta Naharlagun SDPO Rishi Longdo-i ashi.

"Naharlagun PS OC Krishnendu Dev aser par teloki kanga meranga tai tonglokja alir apuba atema tenüngsang

agütsür" ta Naharlagun SP Mihin Gambo-i ashi.

December 14 nü lendong atalokdang Class 9 kaketshir asem- Ekam Bagang, Rei Dol, aser Marsu Dubi nung asü. Iba tatalokba nungsa kaketshir ana- Licha Buttum (Class 6) aser Toko Dulom (Class 8) na yirur anepaludar.

Iba tatalokba sülen school principal, kibur Kapa Rai, hostel wardens ana aser tesayur ka apu. Parnok rongnung nisung pezü bail nung chiokogo saka principal tepuokdak yua lir.

Assam lanur kati Lord Ram anema züluba atema apu

Guwahati, December 30, 2024 (Agencies): Instagram nung Lord Ram anema content yangluba atema Kamrup Police-i arishi küm 20 tain Ricky Khan ta ser nisung ka apu. Ricky dang Rekib Ali ta-a ajar

aserpai postasübaajanga social media nung o atsütep tulu ka tenzüko.

Ricky Khan-i Instagram nung pa ya "Professional Model" aser "Mr. Guwahati 2k23" ta ashir. Nisungtemi pai yangluba content aitsür.

Nisungtemi "freedom of expression" aser tamangba yimsü akhümtsübuba tsüngda tebandang ayutsü indang ashir.

Ozüng amertemi Ricky Khan puogo aser özüng den apet mapa inyakdar.



Union Minister for Consumer Affairs, Food and Public Distribution, and New & Renewable Energy, Pralhad Joshi-i December 29, 2024 nü Tripura semdangdang agiba noksa ka angur. Tesüiba küm 6 ser tesadang tsüngda Tripura nung solar energy generation 2.5 MW aliba nungi 20.5 MW kümogo ta Pralhad Joshi-i ashi. December 28 aser 29 anogotem Union Minister-i Tripura semdangdang sentong aika nung aden aser central schemes inyakbatem repringdanga senzü. December 29 nü Joshi-i Maa Tripura Sundari temple semdang aser Chandrapur Colony Higher Secondary School, Matabari nung Prime Minister Narendra Modi'er Mann Ki Baat broadcast nung aden.

Ind vs Australia: Australia-i Test pezübuba run 148 agi kokogo



Luchii/December 30, 2024 (Agencies): India aser Australia na tang asaya aliba Test asayamung nung Australia-i Hombarnü Melbourne nung Test pezübuba run 184 agi koka parnok 2-1 agi tejakdang kümogo.

Asaya akoktsü atema India team-i over 92 nung run 340 yanglutsü nüngdaka liasü aser parnoki run arishitsü atema kecha tejangraba makai kanga kümanga asaya.

Ajisüaka nikongtsütsü Australia nunger bowler temi kanga junga asaya-a tatebangbuba wicket 7 ya run 34 dang yangludaktsür agia liasü. India nunger asayartemi run 155 dang yanglur ajak out süatok.

India team run 33 dang yanglur wicket asem out süatok,

ajisüaka Yashasvi Jaiswal-i kanga meranga asaya pai ball 209 nung run 84 yanglü, saka asaya atemtsü over 21 dang anunga lia pa Pat Cummins-i out sütsü.

Asaya nung wicketkeeper Rishabh Pant-ia Jaiswal nem teyari agüja batting amen aser pai ball 104 nung run 30 yanglu. Tena dak alia India nunger batter kati danga run 10 dak tema meyanglui liasü.

Iba asaya nung Cummins aser Scott Boland nati wicket asemsem agi aser spinner Nathan Lyon-i batting kanga junga amenba sülen wicket ana agia liasü. Tatemnübuba Australia nunger asayar temi run 234 yangluba sülen parnok ajak out süatok. Lyon ya Jasprit Bumrah-i out sütsü, shibai run 57 agütsür wicket 5 agiogo.

Iba asayamung ya Sydney nung January 2 nü nungi tenzüka Test pongububa aser tatebangbuba asayaba sülen tembangtsü. Iba Test ya Australia-i kokra parnok World Test Championship final-i aitsü, kong parnok South Africa den asayatsü.

India team-a World Test Championship final-i aitsü timla mesamai lir, saka parnok tia parnok kabuma nung mali.

Parnoki Sydney nung asaya akoktsüla aser Sri Lanka-i Australia akoktsü imla ata alitsüla, koba January ita tatemlen tenzüksü.

Iba asaya atema Pat Cummins nem player of the match naroküm agütsüogo. Pai wicket trok agiba den innings ana nung run 49 aser 41 yanglua liasü.

United Cup: Kazakhstan aser Great Britain nati takok angu

Luchii/December 30, 2024 (Agencies): Tang asaya aliba United Cup nung Elena Rybakina-i aniba Kazakhstan team-i Greece koka quarter-finals-i iogo aser Britain-ia Argentina kokogo.

Greek nunger nüngtugu asayar Tsitsipas-i 2024 küm junga masayateti arur iba asaya nung adenshir asaya saka pa 6-4, 7-6 (7/0) agi Alexander Shevchenko-i koka liasü.

Kasa mapang nung World number six aser 2022 Wimbledon champion Rybakina-i 6-4, 6-3 agi Maria Sakkari koka Kazakhstan team-i asaya koka liasü.

“Team atema ni kanga pelar. Onok ajaki meranga asayaogo,” ta Rybakina-i ashi, shiba Novak Djokovic indang taoba coach Goran Ivanisevic den inyakdar.

“Tanü asaya kanga melarabo masü asü aser ni quarter-finals-i aiba atema kanga pelar,” ta laisa shisem.

Rybakina-i mezüngbuba set akok aser tanabuba set nunga la 5-0 agi tejakdang liasü, saka taoba world number three asayar Sakkari-i asaya asem atonga koka liasü. Iba sülen Rybakina-i match point tasembuba nung Sakkari koka liasü.

Shevchenko-i ashiba agi, Tsitsipas akokba ya pa indang career nung asaya tajungtiba

rongnung ka liasü. “Pai tanü kanga jungabo masayatet. Ajisüaka ni kanga junga asayaogo aser asaya koktetogo. Ni asaya kokyonga aruba rongnung iba asaya ya-a tajungtiba ka asütsü,” ta pai ashi.

Sydney nung Katie Boulter-i aniba Britain team-i Argentina kokogo aser Australia densema par telok nung team asemprongla knockout round-i aitsü timla lir.

World number 24 Boulter season tepeyong kanga junga asayaba sülen lai Ken Rosewall Arena nung Nadia Podoroska 6-2, 6-3 agi koka liasü.

Tanabuba Kija asaya nung Britain nungi Billy Harris aser Argentina nungi Tomas Martin Etcheverry na asaya liasü.

Iba asaya ya Tomas Martin Etcheverry-i 3-6, 6-3, 6-2 agi akokba sülen team ana tsüngda deciding mixed doubles ka asayatsüsa aküm.

Tarep temeyoktep asaya nung Etcheverry aser Maria Carle na Boulter aser Charles Broom na den asaya, koba British nunger tarep yagi 7-6 (7/4), 7-5 agi koka liasü.

“Tanü takok anguba atema kanga pelar. Küna tang mezüngbuba asayar saka kanga junga asayaogo,” ta Boulter-i ashi.

Milan-i coach Fonseca mapa nungi anentsüogo



Luchii/December 30, 2024 (Agencies): Roma den kidang goal 1-1 agütsür kasasa nung tembangba sülen AC Milan-i coach Paulo Fonseca mapa nungi anentsüogo. Pa ita trok sülen mapa nungi anentsüogo.

Iba asaya draw asüba sülen European championship tenetben bener aliba team ya Serie A table nung temaba jenjang nung aliba Atalanta aser Napoli na point 14 agi memenepi lir.

36-team Champions League table nunga Milan 12buba anung lir. Parnoki asaya trok nung asaya ana makok aser pezü koker lir.

Fonseca ya June ita Stefano Pioli melena shima liasü. Stefano Pioli lenisüba nung Milan team taoba season tanabuba jenjang nung tembang

aser 2022 nung küm 11 sülen mezüngbuba league title bena liasü.

“Club-i Paulo dang pa professionalism atema kanga pelaba lemsateper aser tarutsü nung takok nguyonga aotsü imlaja atar,” ta Milan indang website nung sangdong ka ajanga metetdaksü.

“Deobar aonung San Siro toktsür aoba mapang Fonseca-i osangbenertem dang pa mapa nungi anentsüba indang jangjashija liasü.

“Hau osangji shitak. Ni mapa nungi anentsüogo. Iba ya taküm yimya. Ni takokba tashi inyakdangogo,” ta Fonseca-i Stadium kima pa indang gari nungi ashi.

Milan pur Italian Super Cup nung Juventus den semi-finals mezüngbuba league January 3 nü asayatsü aser tanabuba leg January 18 nü asayatsü.

Italy nung media osang balala ajanga ashiba agi, taoba Porto manager Sergio Conceicao-i Fonseca melentsü akok.

Taoba mapang Lazio, Parma aser Inter Milan midfielder yagi season trok inyakba sülen June ita Porto tokja liasü.

Bumrah ICC Test Cricketer of the Year atema nominate süogo

Luchii/December 30, 2024 (Agencies): Jasprit Bumrah, Joe Root, Harry Brook, aser Kamindu Mendis nunger ICC Test Cricketer of the Year award atema nominate süogo. Küm tepeyong tajungtiba asayartem nem iba tetushi agütsür.

Bumrah-i taküm Test asaya kanga junga asayaogo. Pai asaya 13 nung wicket 71 agi aser pa indang average 14.92 aser strike rate 30.16 liasü.

Bumrah-i Border-Gavaskar Trophy nunga kanga junga asayaogo aser pai Australia den Test asaya pezü nung wicket 30 agiogo.

Bumrah-i conditions balala nung kanga junga asayatetba ya tenüsangtsü langa lir. Pai South Africa aser Australia amala pace-friendly conditions tem nung dang junga asayaba masü India amala fast bowlers tem atema tetsükdaksü aliba pitch tem nunga junga asayateter.

Kasa mapang nung England nunger batter Root-i taküm Test asaya nung run aika yangluogo. Pai asaya 17 nung run 1,556 yanglu aser pa indang average 55.57 liasü. Root-i century trok aser half century pongu yanglua liasü.



Jasprit Bumrah

Root-i tang agi pangubububa pa indang career nung küm ka nung run 1000 dak tema yangluogo.

Root-i taküm Multan nung Pakistan den asayaba mapang run 262 yangluba ya pa indang career nung Test asaya nung run timtiba yangluba liasü. Iba ya Root atema Test asaya nung double century trokbuba liasü.

England nunger batter Harry Brook-ia taküm Test asaya kanga junga asayaogo. Pai asaya 12 nung run 1,100 yanglu aser pa indang average 55.00 liasü. Pai century pezü aser half century asem yanglua liasü.

Brook-i kanga junga asayaba sülen pa Joe Root,

Yashasvi Jaiswal, aser Ben Duckett nunger sülen taküm Test asaya nung run timtiba yanglurtem rongnung pezübuba nung lir. Brook-i asaya ka nungbo ball 322 nung run 317 yanglua liasü.

Maneni Sri Lanka nunger batter Kamindu Mendis-a iba naroküm atema nominate süogo. Pai küm tepeyong kanga junga asayaogo aser pai Test asaya teku nung run 1,049 yanglu aser pa indang average 74.92 lir.

Mendis ya Sir Don Bradman den külemi Test asaya nung run 1000 takaratiba yangluba asayar kümogo. Pai asaya 13 nung iba alizüing tongteta liasü.

BILEMDANGANG

“Jenjang akaba nisungi O nung masü saka mapa nung sayur.”